

平定粵匪紀略

平定粵匪紀略卷十四

同治元年七月楚軍援豫解南陽府圍

粵逆陳得才等竄入河南境會合五月內竄宜陽汝  
州之賊同竄南陽府鄭巡撫元善札飭候選道何元  
普督馬步兵勇往援由唐河至白河力戰十餘日並  
會南陽鎮總兵圖塔訥兵勇進紮河口逆復糾合賴  
辜捻首陳大清一股共衆十餘萬將我軍包抄分黨  
攻府城在白河兩岸築壘綿亘百餘里勢極披猖鄭  
巡撫添派撫標副將盧得勝由汝州裕州前往湖北

官大臣等札飭安襄鄖荆道金國琛候補道梁作楫督馬步十餘營越境馳援內外夾擊並經民團助戰殺賊二千有奇生擒正法一千餘名於七月十六日解圍賊由鎮平內鄉竄逸

川省石逆達開股匪竄陷湖北鄖陽府屬竹谿竹山二縣旋即收復

石逆達開股匪由四川之大甯竄至陝西平利縣擾及楚邊七月十九二十六兩日闖入竹谿竹山二縣經兩縣團勇擊卻之城均收復賊仍竄陝西平利關

堽子松杉河等處

河南逆匪竄擾湖北光化屬之老河口

豫省逆匪自陳玉成伏誅後窮無所歸前竄南陽爲  
楚軍擊退復由淅川廳馬蹬雙河鎮厚坡李官橋一  
帶竄擾河南兵力單薄無制勝之師致被沿途裹脅  
竝糾合捻匪復有衆四五萬是月竄湖北光化縣所  
屬之老河口官大臣嚴巡撫飛飭道員梁作楫統率  
凱字五營輔以馬隊馳往督同在防水陸各營合力  
勦辦

平定縣志卷四  
湖州逆弁熊德勝正法

前浙江湖州府被圍糧盡援絕戰守極苦千總熊德勝率領兵勇搶米變賣圖利復藉搜米爲名闌入民家弔打勒索迫無可搜括遂開門延賊以致湖城淪陷熊德勝受檢點僞職忽於七月內由賊中潛至上海洋涇浜經李巡撫訪獲卽於軍前正法梟示

天網恢恢疏而不漏足伸

國憲而快人心也

上海軍復克青浦縣城又會同浙軍攻克餘姚縣

李巡撫謀復青浦令副將程學啓等進屯北幹山劉士標郭松林屯塘橋巡撫弟知縣李鶴章率親兵營往督之華爾李恒嵩又自松江來會分圍各門十四日夜學啓敗賊於東北門十五日以大礮裂城垣十數丈諸軍鼓勇畢登賊奪路逃遁李鶴章於西北門設伏截殺之窮追至白鶴江黃渡遂將青浦縣城克復李巡撫令學啓軍與提督黃翼升水師駐守青浦時分往甯波之常勝軍亦會浙江道員張景渠軍攻克餘姚縣城

八月浙軍攻克處州府城並收復縉雲縣

逆匪嵎踞處州牽制援師屢攻不克慶總督端派總兵秦如虎林文察力戰殺賊攻拔郡城賊復分竄縉雲縣各營躡蹤追殺敗匪聞風而遁收復縣城

楚軍赴陝攻克荆紫關連獲大勝

統帶楚軍多將軍隆阿自克復廬州後奉

命督辦陝西全省軍務已抵商南奉

旨勦辦髮逆豫捻時粵逆糾合豫捻已由浙川後路暗襲荆紫關踞之多將軍自商南督軍回勦八月二十一

日夜由陡溝出隊僞扶王陳得才與僞啓王梁成富  
僞主將馬融和等率黨萬餘列隊迎拒副都統穆圖  
善總兵趙旣發姜玉順王萬年等分軍爲四前後環  
攻逆勢不支紛紛敗潰我軍追至荆紫關縱火攻之  
擊死賊目三名生擒七十二名斃賊三千四百名  
焚溺死者無數餘匪由浙川大路而遁踰關追殺二  
十餘里天始黎明遂奪荆紫關

楚軍擊退光化縣老河口各逆

南陽逆匪於上月竄老河口梁道援兵未至之前於



八月十七日圍撲光化縣及老河口市鎮蔓延三四  
十里勢甚披猖經駐防總兵成得升等會督水陸兵  
勇迎頭痛擊斃七八百名賊衆退踞馬窟山雲臺山  
十八日黎明復出大隊擁擠而來我軍連開大礮轟  
斃數百名賊復紮箴從上流潛渡亦經水師焚勦溺  
斃無數城圍立解成得升等復率所部進勦老河口  
賊壘乘兩夜月黑出其不意各路齊進焚其棚壘賊  
衆奪路狂奔追殺二十餘里賊由襄樊竄去

上海軍克復浙江慈溪縣副將華爾陣亡

浙江逆衆規伺甯波值廣艇與法國兵構釁引賊攻陷慈溪縣甯波鎮海餘姚皆警華爾率軍越境攻之華爾自上年正月在滬呈請願隸中國版圖屢以戰功由四品頂翎洊升副將聞甯波告警管帶常勝軍於八月二十六日直抵慈溪指揮兵勇登城立將慈溪克復賊從城上放槍適中華爾胸腕子從背出回甯波後次日殞命得

旨於甯波松江兩府建立專祠仍從優議卹

僞慕王譚紹洸率賊黨攻青浦縣城官軍擊走之竝解

## 北新涇之圍

僞募王譚紹洸方踞湖州李秀成遣援金陵紹洸聞青浦已失恐官軍躡其後乃合嘉湖蘇崑之賊犯松滬西北上月二十日逼青浦官軍敗賊於北幹山賊不得逞遂以北新涇大營新涇爲上海西路之蔽李巡撫先遣已革總兵況文榜熊兆周副將梁安邦等統兵守其地力戰扼之賊稍退二十八日官軍小衄賊圍北新涇分據法華鎮以西距上海僅十餘里八月初一日張遇春敗賊於法華鎮而北新涇之圍益

急時上海之軍只三千人餘皆分防百里外李巡撫  
飛檄劉銘傳等軍由金山衛常勝軍由松江兼程赴  
援密飭李鶴章會程學啓防守青浦諸軍以五成留  
守以五成趨泗涇七寶出賊後初七日學啓等軍間  
道至七寶而賊已先據七寶紹洸率悍黨三萬圍裏  
官軍學啓督諸軍苦戰逾時賊乃大潰追殺十餘里  
而北新涇之圍仍未解李巡撫督軍至虹橋賊方憑  
河據壘伏左右以待李巡撫策騎疾馳過之與程學  
啓軍台令上海軍分道擊賊軍中見李巡撫旗幟爭

歡呼夾擊盡毀賊營賊遁吳淞江北黃翼升率水師  
敗之毀賊北岸七營初四日賊伺我軍歸防又圖回  
竄值劉銘傳軍由浦東至敗之於野雞墩初五日追  
至南翔賊遁嘉定

閏八月粵逆陳得才等糾合各股捻逆竄入楚境分兵  
擊之

逆首偽扶王陳得才等於南陽糾合捻首陳大漭一  
股於浙川糾合捻首張總愚一股並句結盧氏縣張  
落刑一股聚匪已衆上月襲荆紫關竄光化老河口

皆其分黨經多將軍奪獲荆紫關總兵成得升擊退老河口之後各股髮逆豫捻全竄棗陽爲安襄鄖荆道金國琛迎擊逆衆於閏八月初七日竄陷隨州分爲兩股一至京山之朱河一至應山邊境京山一股十五日陷縣城援及天門縣之皂市十八日陷應城縣應山一股十九日竄至廣水驛援德安府迤北一帶官大臣嚴巡撫飛調總兵穆正春帶毅字桓字營馬步會合護軍統領舒保營總花清阿馬隊由雲夢馳赴應城向西進勦飭道員梁作楫帶凱字營由襄

樊馳赴安陸會合又調道員歐陽正壻一軍由河南之邢集回防德安府城以遏應山股賊下竄之路飭令水師總兵張啓基等督率礮船分赴襄淩各河上下策應復將進攻陡溝之副將周鳳山一軍調赴廣水截擊應山股匪竝以逆勢過重奏調多將軍回駐襄陽居中調度以固楚疆

浙軍勦辦龍游等處竝攻克壽昌縣

左巡撫一軍先敗踞逆於蘭溪逆首李侍賢率悍賊五六萬分路來撲我營鏖戰兩時之久逆賊奪路狂

奔閏八月初五日攻克壽昌縣接奪要隘多處築長濠移營進逼龍游其湯溪踞逆亦分兵圍攻之

楚軍攻克應城縣城應山股匪闖入孝感縣立時擊退髮逆豫捻踞應城一股經總兵穆正春於閏八月二十三日由黃江口搭橋過河擊賊獲勝賊向西逃收復縣城率隊追勦斃賊極衆其應山一股由廣水下竄孝感縣之小河司護軍統領舒保等會知縣韓體震登陣守禦閏八月二十六日賊撲縣城舒保帶隊開門出擊賊勢已卻突有後股馬步數千人由北城



關口闌入記名副都統德克登額知縣韓體震巷戰受傷陣亡舒保飛馳入城參將曾紹霖亦督水師礮勇登岸殺入傷斃悍賊多名賊卽奔潰出城追殺三十餘里賊竄小河

楚軍克復京山縣並解安陸府之圍

穆正春一軍攻克應城縣後卽帶駟鐵營騎兵並營總花陵阿馬隊於閏八月二十六日馳抵京山踞逆聞風竄走收復縣城逆首僞扶王等復糾大股直撲安陸府城穆正春帶隊馳至與總兵彭炳武夾攻殺

賊二千餘名生擒二百餘名城圍立解賊竄襄樊

九月上海軍克復嘉定縣城

自賊陷嘉定屢犯滬防英國提督何伯時將受代歸  
乃請李巡撫會攻嘉定新任提督固伯又率英法兩  
國兵助戰李巡撫派調白齊文李恒嵩率常勝軍及  
礮勇分隊往知縣李鶴章督四營繼進中途疊毀賊  
卡九月初一日抵嘉定城下初二日何伯令西兵燃  
炸礮轟坍城牆數十丈分布雲梯一擁而上卽於初  
二日克復嘉定縣城並敗太倉援賊令兇文榜等駐

守之塘橋虹橋軍進屯南翔程學啓屯黃渡黃翼升  
水師二營扼崑山大河以爲守

僞慕王譚紹洸等率衆再犯青浦南翔官軍破賊於四  
江口擊走之

嘉定旣克僞慕王譚紹洸僞聽王陳炳文復糾蘇杭  
嘉興賊十餘萬分道自太倉崑山來犯北由蟠龍鎮  
至四江口圖踞黃渡以當青浦南由安亭至方泰鎮  
圖入南翔九月十二日賊逼南翔官軍迎戰卻之賊  
乃於三江口四江口立五大營設浮橋潛渡水師皆

爲所困而青浦西北之洋新涇趙屯橋白鶴江賊益蔓延擾及重固鎮張堰距青浦十餘里十六日提督黃翼升率水師自青浦出衝賊舟八九里而過賊扼白鶴江不獲進別隊賊犯黃渡十七日知縣李鶴章由江橋至黃渡會總兵程學啓進擊賊陣南岸官軍循北岸進疊敗之李巡撫以四江口營久被圍督諸軍親至黃渡二十一日學啓及劉銘傳副將郭松林之軍分三路擊之自辰至未屢衝不動李巡撫督戰益急諸軍拔籤逾濠進逼賊營斃數賊酋陣少動乃

冒煙直入各毀其前二營右隊賊回救礮傷學啓胸  
復裹創疾戰賊由南岸潰而北鎮守四江營之參將  
劉士奇游擊鄭國魁皆衝圍而出循河殺賊賊退崑  
山常勝軍由杜邨破白鶴江之賊營黃翼升由趙屯  
橋截擊潰賊追至三江口毀其浮橋石卡殆盡生擒  
及殺斃者數萬餘人落水死者以數千計剷平賊壘  
二百餘座防肅清賊自是不敢再窺松滬

楚軍痛勦西北路髮捻各逆

名將軍自克復浙川之荆紫關復准官大臣等咨於

九月初十日馳抵樊城十三日開仗殺賊三千餘名  
追黃龍墻一股至李家橋十四日豐樂河之賊援大  
至多將軍戒勿輕動以避其銳至三更後率隊襲擊  
令我軍袒右臂爲記乘微月直抵賊巢賊恃衆不築  
壘不設備露睡正酣一聲號起槍械並發賊於昏夢  
中奪命狂竄自相踐蹋斃賊無數直追至隨州界入  
鴉雀冲山內山路欹崎不能深入賊已膽落竄往豫  
境其安陸府之賊在龔家集伐木紮籬偷渡穆正春  
由陸路兜剿安陸府知府周有全等率礮船乘風縱

火水陸斃賊甚多餘匪亦遁赴河南

江南水師力保蕪湖金柱關城隘

閏八月間偽護王陳坤書糾衆四五萬圖犯金柱關  
冀橫格甯國金陵兵氣彭侍郎玉麟督禦於花津五  
戰皆捷賊退踞薛鎮十八日諜報賊艦數百從東壩  
拖壩而出彭侍郎親駕飛划迎擊楊提督岳斌聞警  
赴援先在姚老圩毀賊浮橋獲勝仗賊乃不敢渡河  
九月初五至十二等日大股悍賊結筏偷渡屢逼金  
柱關各營奮力馳擊盡焚隔河賊壘賊遁魚壩十八

日水陸大舉遇賊於花山總兵周萬俔一騎當先所向辟易各將士橫戈躍殺賊退向上駟渡適水師已將彼處浮橋砍斷賊回戈轉鬪衆軍合力圍殺棄尸駢積河水不流聚賊萬餘無一得脫者其竄頭等處之賊尙延袤百餘里我軍合隊環攻焚其壘花津青山象山采石磯各處賊巢自二十至二十九日悉數平毀奪賊船無數自是蕪湖金柱關六十里之間賊蹤以絕

鎮江軍敗賊於湯岡



逆匪由句容進薄鎮江紮壘於湯岡經鎮營廣西馮  
提督子材京口魁都統玉策勵諸軍更番攻擊設伏  
誘擊斬其梟渠逆已自相驚擾九月十二日飭令總  
兵龍文德陶茂林等督隊填濠而進將湯岡九壘踣  
平賊歸青山老巢乘勝拔之賊復大潰竄回句容

十月逆匪復犯楚邊陷房縣由竹山竹谿二縣竄入陝  
西境

九月內髮逆僞扶王陳得才僞啓王梁成富等由湖  
北分竄河南十月初九日復由河南之新野鄧州繞

至浙川廳所屬之李家橋闌入湖北鄖陽撲府城十六日經鄖陽鎮總兵訥欽署鄖陽府知府艾浚美會同知府周有全水師內外夾攻賊衆敗退從安陽口偷渡河西由均州之白浪黃龍灘等處竄擾房縣二十一日入縣城次日經知縣慶明激勵兵團乘賊不備一鼓登城斃賊數百名卽將房縣克復敗匪由九道梁田家壩竄擾竹山竹谿境內頭隊陳得才先竄至陝西平利縣後隊梁成富等在竹谿之水坪草鞋壩等處橫亘二百餘里官大臣等派遣員梁作楫往

勦竝飭安襄鄖荆道歐陽正壻統領四營會同勦辦  
逆等於十一月內全股入秦調金國琛回駐襄樊改  
派候選郎中李雲麟統帶毅健五營馳赴鄖西之上  
津堡駐紮以扼回竄

### 江甯陸師堅守四十六日力戰解圍

僞忠王李秀成親率十三僞王號稱六十萬箇聚金  
陵東自方山西至板橋鎮旂幟如林層層排列於閏  
八月二十日直逼我軍營壘尤趨重於東西兩隅同  
知曾貞幹等縱軍兜擊追賊於小河邊斬級頗多二

十一日城賊拔賊同時竝進江蘇布政使曾國荃飭各營俟賊逼近突以排礮擊之賊乃踣伏在地礮聲絕而殺聲又起日夜不息二十二日賊由東西兩路進攻分黨徑趨洲上抄出猛字等營之後我軍分路擊敗之乘夜於上洲修築十數壘駐兵扼守二十三日甫將攻撲猛字各營及東路營壘湖橋營卡之賊勦退賊之圍逼西路者已歷六晝夜各營料賊疲乏越濠擊之突破四壘二十六至二十八等日夜賊乃悉向東路逼營而陣洋槍洋礮驟若飛蝗潛通地道

百計環攻各將士負牆露立拋擲火毬殲賊無算二十九日賊負板蛇行而進烽燧蔽天填濠欲上我軍用矛擊刺賊匪拽尸復進抵死不退曾布政督軍策應飛子傷頰血流交頤仍裹創上濠守禦九月初一日僞侍王復自浙東來援急攻吉後營礮臺曾布政引軍馳救力破賊衆初一至初四等日賊來愈衆用箱篋實土排砌濠邊暗鑿地道我軍先以火箭攢射繼出銳卒擊之賊鋒少挫初五日分三路出擊燬西路賊壘十二座初六日以後東路之賊環逼不懈十

二日嘉字吉後兩營地道轟發石飛天半擁入塌口者各有千餘賊我軍俟煙開土落分路衝出忍死決戰將塌口以內之賊誅戮無遺濠外賊渠復舉旂督戰各營同出抄殺賊之精銳摧折無算其同時迸裂者有副後營亦經擊退被圍者尙有信字等七營復經我軍內外夾擊賊衆敗走是役殺賊近萬逆賊雖受大創尙圖再逞於東路別開地道於西路夾長江之水淹絕糧道曾貞幹在高埂增修小營令水師駐泊雙牖共護饋運之路曾布政與諸將共議制敵之

策莫若審賊所向隧而迎焉自十三日以至十月初二日凡破賊七壘四穴掘穿地道五處均聚而殲之無一生者賊技益形窮蹙會布政遂於初三日乘賊摺伏進拔十數卡初四日夜分道齊出破東路四壘悉就誅夷西南諸壘望風驚潰初五日共追賊至南路牛首山一帶埽平賊壘數十座搜勦至方山之西雨花臺守賊勾結城賊絕我軍歸路各營左右盪擊賊衆分路悉遁重圍遂解

中外官軍克復浙江上虞縣城竝乘勝進兵攻克嵊縣

新昌縣

浙江逆匪自華爾克復慈溪後竄踞泗門鎮已革甯  
紹台道張景渠馳赴餘姚會商英國兵勇嚴守慈溪  
調總兵勒伯勒東及稅務司日意格帶兵會籌直抵  
上虞縣城節節進剿破賊卡十四座揮兵逼卡連放  
炸礮斃賊千餘人蹋毀通明堰賊卡二座中外官軍  
直伯城下勒伯勒東運到車輪大礮轟坍土城卽於  
十月初一日將上虞縣克復其泗門等處賊匪亦經  
中外官軍合力埽盪其另股竄踞嵊縣新昌縣者均



先後爲官軍攻克左巡撫李巡撫會同馳奏得

旨嘉獎

上又念左巡撫督兵進圍湯溪等城指日即可靖盪而下  
已革道員張景渠會同法國武官令充中國總兵勒  
伯勒東稅務司法國人日意格等奮勇立功進攻紹  
興浙東軍務漸有起色官軍進剿之際甯波海口緊  
要不可無武職大員統帶飭署浙江提督秦如虎馳  
往鎮守後勒伯勒東進剿紹興親點大礮以藥重炸  
傷頭頂殞命得

旨嘉憫優卹之

上海軍進取蘇州

十月二十六日提督黃翼升督水師勦賊於蘆墟鎮  
尤家莊汾湖三官塘盡毀其卡進距蘇州三十里二  
十七日復回軍勦賊於下田廟上田廟洪家灘進至  
甯街距嘉善數里

皖南防軍解旌德涇縣之圍徽浙各軍克復績溪祁門  
兩縣

十月初八日賊酋賴文鴻古隆賢等自廣德甯國竄

入旌德縣之六都總兵朱品隆禦於楊邨一戰卻之  
十二日賊乃分股來撲朱品隆飭將弁悉力抵禦親  
自出營突陣賊始退奔是夜賊又擁衆進攻越兩日  
夜無一刻息朱品隆恐賊營一定糧路不通啓城出  
擊破賊四壘十七十八等日賊復大聚攻城朱品隆  
親率老營部卒向大北門往來督戰我軍縱橫盪擊  
賊紛紛潰敗十九日分路出擊毀平賊壘二十餘座  
賊向楊邨轉遁解圍以去其環攻涇縣之賊亦於十  
月初四日被援軍擊退先是昌化踞賊率黨數萬竄

入績溪城冀絕旌德防軍糧路總兵唐義訓會合浙  
江左巡撫派援之卽選道王文瑞分路進攻賊已竊  
擁猝至我軍從山梁壓下賊衆披靡尸駢林谷賊遂  
棄績溪遁去唐義訓等追勦之時旌德之賊已於十  
月初三日突陷祁門乃回軍會攻賊見大兵驟至闔  
城鼎沸遂返竄石埭太平一路縣城卽於初十日克  
復

十一月皖軍在九洲等處堵勦獲勝

九洲在金陵下關對江賊踞爲老巢堅築石壘列

巨礮三層與下關賊營相犄角以扼泝江進擊之路  
咸豐間屢經六合團勇及江北各營攻奪以孤軍難  
守復爲賊有江南提督李世忠列營下游浦口以堵  
之十月間僞忠王李秀成等糾衆渡至九洲圍撲  
官營李提督親赴前敵力籌防勦十七等日逆分兩  
枝突至浦口遣悍賊數千人繞過前營負土填濠勢  
甚兇猛李提督出營突陣馳逐礮火之中馬傷立蹶  
復步戰搏賊斬首百餘級賊始遁連日賊之分撲各  
營者均擊退二十一等日又攻南岸石埠橋營竝結

筏冒雪渡江復由九洑洲分股竄至江浦以北希圖  
牽制各營我軍出隊夾擊賊向和州一帶竄逸李提  
督親駐江浦督飭各軍分路抄擊斃賊二千名賊船  
乘夜渡江突過小甸分隊出撲李提督督軍回勦賊  
衆大潰十一月初六等日我軍毀平石埠橋各壘賊  
仍環逼略無退志李提督飭各隊夾攻截賊隊爲數  
段賊多不及歸壘我軍斬卡直入立將東西南三面  
賊壘一律剗平其北岸分撲浦口各營賊匪經我軍  
戰守兼施賊悉撤圍遠竄

# 浙軍攻克嚴州府

逆踞浙江之嚴州疊次出擾均擊退十一月十二日知府魏喻義偵知賊欲傾巢出犯先令官軍設伏以待是晚逆前隊竄至鍾嶺脚伏兵齊起四面圍殺悍賊五百餘人無一脫者後隊驚竄入城十三日夜半魏喻義督諸軍潛抵郡城於西北兩門豎立雲梯一擁齊上立克府城殺賊萬餘焚溺無數燒賊船二百餘隻獲偽印二百九十三顆馬匹旂械無算殘匪無路可遁棄械投誠

鮑軍破賊於馬頭鎮楊柳鋪

先是西河踞賊分擾小淮審浙江提督鮑超誘賊過河一擊敗之旋報花旗廣匪六萬餘由甯國縣竄至歇高橋楊柳鋪馬頭鎮一帶滿布賊館鮑超以老營空虛卽由黃麻渡捲旂息鼓振旅還援先令總兵宋國永守定高祖山老營十一月二十七日從抱龍岡進兵賊恃衆來拒旌旂亂展鼓音若雷密布長圍傷我營哨數人鮑超分大隊自山岡後抄入截賊數段賊隊大亂諸軍合力薄之遂將歇建廟至楊柳鋪十



數邨落中賊壘賊卡一律平毀追進六十里殲斃約  
八千人自有此捷高嶺等處賊股伏匿不出者經月  
上海軍收復常熟昭文縣城進克福山旋陷官軍困守  
常熟昭文

常熟昭文二縣同城久爲賊踞而福山距城十八里  
爲江南重鎮與江北之狼山鎮對峙乃由江入海之  
鎖鑰賊并踞之以窺伺江北常熟守賊錢桂仁駱國  
忠董正勤與太倉賊酋錢壽仁密通款於我軍知州  
李鶴章督軍攻城賊約期內應十一月二十八日國

忠夜飲桂仁黨就座斫殺憑天安錢嘉仁逮天福姚  
得時竝誘殺桂仁之衆舉城雍髮降國忠方令其下  
奈拔羣等招福山守賊胡輓經元等降而福山已固  
守十二月初一日國忠率其衆攻拔福山濟白徐六  
涇諸海口竟日皆下我軍方進規太倉風雪阻師不  
得進而蘇州內應事泄譚永洸悉衆爭常熟招江陰  
無錫賊六七萬來會又令楊舍之賊乘隙陷福山官  
軍困守常熟昭文

十二月曾營分攻運漕鎮銅城牐

三  
偽對王一股由九洑洲渡江竄陷巢縣含山和州三  
城遂踞運漕鎮銅城牐東關各隘知無爲州米足兵  
單於十一月二十四日徑撲州城會大臣調記名提  
督蕭慶衍記名道毛有銘兩軍先後馳至議以毛有  
銘嚴備東關巢縣之賊蕭慶衍專攻運漕鎮銅城牐  
之賊十二月初九日蕭慶衍陸師過河結營彭侍郎  
派水師護陸師向運漕自上攻下親督各水營向三  
汊河自下攻上先將彼處三石卡一大壘焚毀引軍  
西上與護陸師之水師相遇乃知大馬橋二壘亦就

毀平蕭慶衍督率各營四面縱火斬隘直入立復運  
漕鎮二十一日蕭慶衍連破陶家背等處賊壘水師  
亦毀沿堤數卡立焚岷山岡二壘繞出銅城牐後二  
十二日賊分三路來犯蕭慶衍縱兵抄擊牐口之賊  
衝圍而出岡東一股聞風竄逃牐西一股亦經水師  
擊走之

川軍攻克橫江等處賊巢連獲大捷

僞翼王石達開久擾四川屢勦未逞旋踞叙州之橫  
江雙龍場等處集衆數萬負嵎固守十二月十二日

蕭慶高何勝必分道而進直抵橫江以火彈拋入賊營登時延燒我軍奮勇前進連破賊二十餘卡提督胡中和由山後小徑破卡而入賊衆驚竄兩面合擊立將橫江兩岸賊巢焚燬並將唐家坡及張窩等處賊壘削平統計前後斃賊二萬餘人生擒二千七百餘名內有僞官二百餘名墜河及乘間逃散者約計數萬是日臬司劉嶽昭進攻雙龍場賊巢察得降賊郭集益等內應官軍疾趨破賊營二十餘座賊勢不支棄巢狂奔官軍乘勢追殺斃賊一萬五千餘名陣

斬僞都督等四十餘名內應之郭集益等率衆三千  
餘人詣營乞降其敗竄之賊復於會儀溪等處殲斃  
數千名十三日石逆率黨向燕子灘渡橫河官軍乘  
其半渡擊之復斃千餘名餘匪逃入雲南境

平定粵匪紀略卷十五

同治二年癸亥正月曾營鮑軍進援涇縣解圍

正月初一日僞匡王僞奉王僞襄王等率衆六七萬  
竝糾合僞躡王藍逆等花旗廣匪進逼涇縣連壘二  
十餘座於初四日架梯蒙絮悉銳撲城守將易開俊  
等以木石下擊賊始斂退時浙江提督鮑超在高祖  
山老營聞警簡隊疾往初五日入城初六日出戰羣  
賊蟻擁來撲戰逾兩時我軍佯退誘賊入伏兩面夾  
擊賊始大敗正欲歸壘見壘中火起已爲我軍所破

各兵勇乘勢併進立解城圍長驅三十餘里又平黃  
邨賊壘十餘處初七日自涇縣回軍適西河之賊撲  
進老營將圖一逞南望旂幟蔽空軍容甚盛乃相顧  
錯愕曰飽超來矣一闕而散

浙軍攻克湯溪龍游蘭溪三縣及金華府城

金華踞逆恃湯溪龍游蘭溪三城爲犄角官軍圍攻  
湯溪疊敗賊援勢漸窮燧正月初十日藩司蔣益澧  
密約降賊彭禹蘭內應將僞忠裨天將李尙揚等賊  
目八名誘擒旋啓西門官軍衝入斃賊九千餘名當



將湯溪縣城克復援賊向金華狂奔總兵高連升等率軍追殺龍游之賊聞風而遁收復縣城其蘭溪之賊爲臬司劉典於十二日攻克是日金華府城踞逆劉政宏等見官軍進紮白龍橋遂率黨由東門逃竄高連升乘勢奪門而入殺賊二千餘名遂復府城浙軍續克永康武義縣城收復浦江諸暨二縣

自湯溪等城攻拔後逆之險要已失永康踞賊亦經都司馬雲標率勇擊退於正月十三日克復縣城總兵林文察同日攻克武義縣其東陽義烏之賊聞風

向諸暨一帶潰竄臬司劉典於十八日收復浦江進逼諸暨奮力圍攻城賊乞降亦於二十三日收復

陝西軍收復興安府新舊二城

髮逆豫捻陳得才等於上年十月內由湖北之房竹二縣竄入陝西旋於十二月二十等日陷興安府新舊二縣意圖久踞經團總監生邱振家招集團勇於正月十四日隨同知縣方傳理督率水路各勇乘夜薄城逆等猝不及防放火奔逃官軍立將舊城收復縣丞周錫齡等乘勢趨新城賊亦棄城奔竄有入川

者有竄紫陽縣者

浙軍克復紹興府桐廬縣浙東肅清

浙軍攻克浦江諸暨逆何文濤率黨由紹興竄撲諸暨經高連升等率衆迎抵賊衆敗遁而東陽永康等處敗匪復紛紛竄至官軍合隊縱擊殺賊甚多臬司劉典乘勢規取紹興署提督葉炳忠已於正月二十八日督甯波諸軍將紹興府城收復敗匪萬餘與桐廬踞賊沿江築石壘抗拒我軍水陸合攻遂將桐廬縣城克復蕭山踞賊亦渡江紛竄浙東肅清

二月僧王追抄竄擒連獲大勝生擒擒首張落刑等  
擒逆各自爲股各有逆首以蒙亳之張落刑爲巨擘  
受粵逆僞封擾害楚豫江皖荼毒生靈較各擒首尤  
爲稔惡

欽差大臣科爾沁博多爾噶台親王僧王自盪平北犯逆  
衆後總統東三盟及馬步各隊專勦擒匪大小數百  
戰逐漸剷除時在蒙亳一帶勦辦適張落刑等齎聚  
尹家溝意圖竄突二月初一日僧王派翼長舒通額  
蘇克金等帶領各起馬隊馳往圍攻逆衆拚死出撲

截殺多名向東南竄遁侍郎國瑞帶托倫布等馬步  
逕攻雉河集張落刑老巢張逆聞風逃竄遂將雉河  
集尹家溝兩處賊巢全行平毀初二至初七日舒通  
額等疊獲擒首正法擒首李勤邦等赴宿州知州今  
安徽巡撫英翰行營投誠領計將張落刑並其子張  
溱義子王碗兒誘獲解送僧王大營奉

旨張落刑極刑處死張溱王碗兒一併正法傳首被擾各  
處天下快之

鮑軍攻破賊巢悉復西河小淮甯紅楊樹麒麟山等四

處要隘

先是僞輔王楊輔清糾合各僞王嘯聚西河紅楊樹麒麟山一帶不下十萬餘人以一大股抄出高祖山之前以一小股繞過高祖山之背揚言上犯涇縣實欲圖鮑超霆字老營鮑提督令總兵宋國永堅壁穩守親率數隊伏於太子廟山坳以伺其變二月初一日賊分三四萬衆迤邐而來將高祖山八營層層圍裹鮑提督急帶太子廟伏軍向小徑疾趨離營二里許聞老營業已接戰乃令各將弁分三路進仍令總

兵梁美材等潛伏茯苓山之旁以斷賊後鼓角一聲  
三軍突出宋國永乘勢夾擊賊隊譁亂奪路竄走將  
近茯苓山梁美材大呼斷路賊駭懼無措衆軍合力  
蹙之追襲四十餘里遂平高嶺周家橋諸壘直抵西  
河結筏爭渡立毀堅巢其馬家園小淮審賊壘亦經  
總兵王可升襲破維時賊之由西河遁入灣沚者霍  
營礮划隨同江外水師日夜轟擊賊乃於初三等日  
歸併梅嶺麒麟山一帶賊壘初四日鮑提督引軍渡  
河進次紅楊樹賊匿不出軍士踰濠直進盡毀羣壘

初五日鮑提督遣書甯國守將劉松山令率師來會  
傳令宋國永等專攻麒麟山總兵婁雲慶等專攻梅  
嶺而以劉松山爲斷後賊糾衆來迎宋國永縱兵掩  
擊積尸若阜麒麟山賊壘悉平是日劉松山亦破廟  
埠之壘婁雲慶破梅嶺之壘並收復仰賢圩各處餘  
匪分道竄逸

川軍截勦髮逆獲勝殲斃中旂首逆賴裕新

僞翼王石達開竄入四川以逆酋賴裕新卽賴剝皮  
爲前鋒名爲中旂疊擾甯遠高巖等處經總兵朱桂



秋等攻勦竄入越嶠廳城署同知周歧源等連日力戰將賴裕新擊斃逆衆既無統率拚命狂奔闌入榮經天全各城知縣孫怡祿知州丁雲章等於二月二十一二等日督帶兵團晝夜力戰克復城池賊竄邛州之高家場邛州團練橫擊賊敗退由大邑竄至邛江等處

鎮江軍截勦西路竄逆直抵丹陽

偽懷王周逆等糾衆竄至句容城外會合丹陽逆酋偽效天義陳逆圖由九洑洲北渡馮提督子材派總

兵張文德等扼橋據險分路進攻二月初五日直趨  
牧馬口沿邨十餘里賊卡林立官軍馳突屹不少動  
游擊湛恩榮飛騎衝敵手殪賊目數名賊陣稍卻守  
備李耀光從槍子中躍馬先登陣斬執旂逆酋直搗  
中堅官軍無不以一當百立將牧馬口賊卡全行焚  
毀東湖伏賊聞聲齊起張文德派隊抄截賊衆大潰  
追過句容縣境之薛邨斃賊三千餘名內有僞來天  
安僞檢點二名張文德等於初六日夜銜枚馳抵南  
路柏林邨老巢總兵田宗揚等率所部進紮豐樂山

扼險憑高遙爲聲勢初七日卯刻張文德等乘大霧  
四塞揮軍疾攻精騎如墻而進逆衆不測多寡出巢  
迎敵副將楊青山首先突陣殲斃黃衣賊多名都司  
古龍光躍馬入陣斬陳逆於馬下卽四眼狗陳玉成  
之叔也餘賊駭奔向西南敗竄官軍乘勢奪毀柏林  
邨逆壘直追至丹陽西門

上海軍解常熟昭文縣圍

正月賊圍攻常熟昭甚急譚永洸又益以礮船二百艘  
穴地攻城降將駱國忠悉力扼守李巡撫以福山背

水而軍兵單賊衆不可無援急檄常勝軍往二月初  
四日李恒嵩以千人至因移營逼賊壘初五日城賊  
來援劉銘傳督隊擊敗之是時賊之攻常昭者雲梯  
地道皆具屢拒屢進勢益危李巡撫議先福山以解  
城圍十五日戈登又以常勝軍至專攻賊壘而令各  
軍分擊援賊常勝軍設西洋大小礮於福山舊城上  
以利轟擊各營勇伏於舊城下連放開花炸彈擊倒  
港東賊壘由牆闕擁進悉數殲殪港西賊營亦卽攻  
克時謝家橋等處之賊同時來援黃提督翼升分路

搏戰賊爲披靡遂復福山石城是夜各營潛襲大義  
橋謝家橋賊壘逆衆棄壘狂奔沿途追殺先是圍城  
之賊知福山警皆赴援止畱數千賊攻城駱國忠等  
派兵由西門殺出連日鏖戰生擒逆首孝天義朱衣  
點殲匪極衆遂於十九日解常昭城圍計常昭一城  
孤懸賊中與松滬各軍聲勢阻隔凡血戰苦守七十  
餘日殲賊不知凡幾

### 陝西軍收復紫陽縣

髮捻各逆自興安分股竄陷紫陽縣旋爲地方官環

攻收復逆衆復撲漢陰廳石泉縣十餘日之久在事  
官紳以少擊衆力解城圍

江北之浦口江浦兩城復陷竝失橋林要隘李提督引  
咎自請革職

江北李提督世忠督兵分營於浦口以圖九洑洲被  
逆二萬餘衆圍攻斷我糧道各將弁堵禦兩晝夜軍  
火不繼勢難再振遂撤回江浦城內逆衆繞城密困  
水泄不通城中糧藥均罄各將弁冒死潰圍而出其  
橋林營盤復被賊衆六七萬攻陷李提督具呈自請

革職撤去勇號由曾大臣代

奏奉

旨失守各營實因糧盡援絕衆寡不敵尙非有心貽誤上年攻克六合等城頗著戰功加恩撤去幫辦軍務免其革職以示薄懲

江南水陸各軍在蕪湖金柱關累月苦戰克復要隘上年十一月以後僞侍王李侍賢自金陵敗遁糾悍賊數萬屢犯金柱關累月不息凡拒賊於花津上駟渡三汊河薛鎮新圩角梅塘觜等處我軍皆獲全勝

復攻破涂家渡萬頃湖賊黨卡壘蕪湖防軍亦勦賊於南新圩三不管等處平毀四壘二月初四日潛泚踞賊將犯我清水河水師營官萬化林等乘夜潛往適浙江提督鮑超新破西河之賊派舢板船從清弋江而下合力猛攻於濃霧中分水勇爲旱隊在街口積薪焚之羣賊猝不及防出巢分竄我軍遂復灣沚一隘三月初十日三里埂之賊退併黃池萬化林等飛駕舢板直逼黃池石壘之下逆衆自恃岸峻壘堅列礮以待萬化林奮力仰攻復帶數哨登岸與水面



戰船摩壘夾擊各賊驚潰立克黃池剗平石壘總兵  
朱南桂等陸軍約會水師亦於是日盡破伏龍橋護  
駕墩花津賊巢羣賊遁往金寶圩溧水丹陽一帶

### 三月上海軍攻克太倉州生擒首逆

上海軍攻克福山常昭解圍後太倉踞逆偽會王蔡  
元濤畏懼聲威遞稟乞降李巡撫許之命統領李鶴  
章與總兵程學啓率師往賊期於三月初九日駐隊  
四門迎師我軍嚴陣以待鶴章軍已渡河將入城東  
南門各出賊數千裹白巾乍變伏賊盡起我軍急退

鶴章傷足幾及於難時學啓方扼西門猝見賊舟八十餘隻賊數千名自崑山來城賊與語甚暱疑而爲備賊果以千人出犯學啓督軍奮擊始退十一日賊復犯婁塘前敵營擊走之李巡撫得報檄戈登李恒嵩統常勝軍赴攻十二日常勝軍毀南門賊卡十四日賊際天福李文熙率礮船截河口程學啓以洋槍隊襲其後而自督水陸迎之賊皆殲焉竝敗城中援賊戈登以大礮毀二石壘十五日鶴章軍南門防竄賊列礮轟裂城垣十餘丈各軍越濠而進賊走南門

不得出將城內賊匪萬餘名悉數圍殺卽日克復州城李巡撫督飭各軍乘勢進攻崑山

逆匪疊撲石澗埠及廬江舒城桐城會營各軍力卻之僞忠王李秀成於三月初二日犯石澗埠近逼我營守將毛有銘劉連捷等密飭士卒穩守營寨以觀其變初三等日賊衆數萬撲近濠邊我軍槍礮環擊殪其前鋒賊曾晝夜猛攻相持不下初七日毛有銘潛出銳卒焚其積草劉連捷復於初七日派隊毀其攻具賊於前營復增壘盈百層層合圍時江蘇布政使

曾國荃升授浙江巡撫辦金陵軍務聞警卽派記  
名道彭毓橘率隊倍道而至彭侍郎亦派隊渡江來  
援遂與提督蕭慶衍會於黃雒河十六日彭侍郎親  
督水師至海子口遣死士約期會戰是夜彭毓橘攻  
皇圖寺蕭慶衍攻迎珠塔號礮一發毛有銘卽衝出  
重圍會合夾擊盡洗羣壘忠逆向小嶺開成橋而遁  
賊之大股先於十二等日逼犯廬江十九日忠逆大  
股自石澗埠而來圍撲城池曾大臣飛檄浙江提督  
鮑超以援江之師轉援廬江而賊已於二十日經廬

江守將擊敗西竄二十一日突攻舒城安肅道蔣凝學設伏大敗之維時髮逆馬融和等由豫間道至犯皖境馳至銅城湖南提督周寬世出戰三里街賊大懼遁往孔城鎮與忠逆合而爲一

浙江江西官軍會克安徽黟縣城

逆匪竄聚皖南之黟縣祁門圖竄江西王文瑞等擊賊於七里橋小路口千佛橋等處斃賊七八千名生擒八百餘名陣斬僞佑王李遠繼其黟縣踞賊經江西沈巡撫葆楨派同知直隸州王沐督軍與升授閩

浙左總督宗棠所派援皖之師分路進剿三月十四日江西官軍於柘木嶺左右斃賊百餘名賊向雙流溪而遁又敗之於李坑口茅蓬店高嶺脚賊歸黟縣四五都老巢十七日浙江臬司劉典會軍分攻賊傾巢而出官軍左右夾擊賊勢不支紛紛潰敗當將黟縣城池克復王沐等督軍進紮黟縣迭擊撲營悍賊陣斬僞綢天義古文祐追至羊機嶺敗賊向嶺外逃竄共蹋平賊壘二十餘座斃賊近二千名嶺內一律肅清

江西軍復破賊於祁門

三月十五日僞堵王黃文金合許家山等處踞匪率悍賊十餘萬由祁門進逼與參將韓進春對河而陣韓進春飛調兩路馬隊及左右營助戰槍礮環施殪其前鋒甚多賊仍屹立不動將士奮力死戰賊始披靡血戰四時殺賊千餘名竝將陣斃之僞孝王胡鼎文梟首示衆

四月李秀成大股進圍六安州官軍固守鮑軍往援追克東關銅城插兩隘

偽忠王李秀成前隊衝至六安州之十里舖候補道  
曾廣翼署知州何家驄與副將王臨祥袁秀林力籌  
守禦三月二十四日賊以大股繼至自東南迤北而  
西面面結壘二十五日賊分三路來攻將抵城下城  
垣久爲風雨所損猝傾六七丈羣賊大呼擁入王臨  
祥麾兵攢刺擲尸城下曾廣翼袁秀林飛騎馳至悉  
戮進口之賊槍築木城二道二十七日賊衆傾巢出  
犯我軍復擊退之二十八日曾廣翼等令勇士縋城  
馳擊斃賊數名三十日又縋士出襲擄糧之賊斬偽



富天豫張承德等適曾大臣派援之浙江提督鮑超將至舒城賊遂於四月初二日解圍遁去鮑超追擊從柘臯進兵以攻巢縣之北記名按察使劉連捷提督蕭慶衍等從迎珠塔進兵以攻巢縣之東彭侍郎謂欲圖巢縣必先力取東關銅城廂毀其門戶四月初五日令蕭慶衍等專攻銅城廂派水師會合劉連捷等專攻東關初六日夜劉連捷令師船由蟹子口潛渡陸師緣隄而進設伏九峰山下另遣勇士數十人從東關近處暗渡毀棚越濠肉薄登壘各軍奮力

繼進賊惶懼而遁復經伏軍衝殺立破石壘遂於五更克復東關黎明七陳邨等處之賊來援我軍分路搏鬪盡焚各賊卡館而還其攻銅城牖之蕭慶衍等各軍於初六日過八角廟下寨奮攻一日夜賊黨伏匿不出乃留隊扼守八角廟率師移勦百旺市五顯集一帶先清銅城牖之後酣戰數時將兩處卡壘一律平毀振旅而還水師乘勢猛攻陸軍亦萬槍齊放踹毀南街土壘遂攻破銅城牖一隘駢尸塞道無一得脫而林頭鎮另服亦爲水師擊走

上海軍攻克崑山新陽縣城竄賊擒斬殆盡

逆首僞大將夏天義等率悍賊數萬久踞崑山新陽縣城李巡撫自克太倉卽令戈登統帶常勝軍與總兵程學啓等各軍分路進勦直逼賊巢僞慕王譚以洸由蘇城糾合大股來援爲水陸各軍擊退斬首百餘級慕逆復於北門一帶紮營環逼參將周良才等督兵奮擊戈登放炸礮助之連破賊營二十四座殺賊逾萬程學啓察看地勢知正義鎮爲蘇賊援崑必由之路因於四月十二日與戈登駕坐火輪船繞赴

正義鎮率同總兵郭松林等分頭攻勦破石壘兩座  
募逆見歸路已斷出賊三四萬人奪路狂奔伏兵截  
殺水師礮船連環轟擊賊不能支紛紛回竄我軍分  
路直抵城下各駕雲梯蟻附而上遂於十四日克復  
縣城前後生擒悍賊七千餘人轟斃二三萬人落水  
死者無算

曾營水陸各軍會克巢縣含山和州三城

我軍自克復東關銅城牯後大戰於笄箕山逼紫望  
城岡四月二十二日水陸兩軍進攻巢縣賊踞城壘

矢石交下相持竟日二更後水師環隄猛擊悉焚湖  
中賊划毀其浮橋記名按察使劉連捷自河南飛騎  
馳至其破沿河六壘羣賊競向東門回城我軍卽躡  
蹤從東門而入別隊由南門攻入適浙江提督鮑超  
亦派數營從廬州西來遂於二十二日夜克復巢縣  
二十四日劉連捷等及提督蕭慶衍一軍與鮑提督  
會師於含山賊已宵遁鮑提督以賊去未遠星夜往  
襲和州比入州境水師已駛入和州港內城賊逃遁  
不及半聚壘中大怖乞降盡釋脅從斬其頭目以徇

於是各整部伍入城休息

### 上海軍克復楊舍汎城

我軍克復福山其沿江上海爲江陰縣縣屬之楊舍汎爲江邊著名險要距常熟江陰各五六十里賊匪糾衆死守以蔽江陰總兵劉銘傳等督帶兵勇進紮鹿苑步步近逼黃提督翼升親督水師沿江兜擊賊衆分黨來援自四月十六至二十一等日先後擊退二十二日官軍分路猛攻大呼登城守城悍賊二千餘名殲戮殆盡擒斬首逆趙尙林等多名立將楊舍

汎城克復

浙軍截抄富陽新城援賊

浙東肅清後左總督統軍攻富陽以進規杭省僞聽  
王陳炳文等率匪黨由餘杭趨臨安圖竄新城以襲  
官軍後路經道員魏喻義等督兵進抄殲賊千餘賊  
復乘霧分道來犯攻撲新城官軍俟其近城礮石交  
下斃賊不計其數提督高連升等又督兵往援賊衆  
拋棄攻具向臨安路鼠竄而去

江甯陸師攻破雨花臺僞城及聚寶門外諸石壘

偽忠王李秀成自六安戰敗率衆東竄紛傳將回救  
蘇州李巡撫致書曾巡撫囑其力攻上游以分賊勢  
毋令忠逆得以全力援蘇曾巡撫以忠逆回救蘇州  
固可慮尤虞其直犯揚州計莫如急爭金陵老巢使  
無暇他顧乃於四月二十七日令各軍多備攻具乘  
夜出隊以總兵李成典等專攻雨花臺石城副將趙  
清河等攻聚寶門外南卡石壘總兵晏澧邁等攻西  
卡石壘副將何玉貴等攻東卡石壘三更時潛抵石  
城石壘東草填濠架梯欲上賊衆驚覺燃礮外擊勇



隊少卻李成典率旂直前諸軍分擲火毬火箭悉入石城天漸嚮明副將趙三元等分督各隊肉薄齊登敵樓火發逆勢不支當將僞城攻拔其聚寶門外九石壘亦經趙清河等奮力平毀餘賊竄逃我軍追過長干橋逼入水者無數城內之賊潛出大股接戰復經各軍截勦敗竄回城

雲貴勞總督由川入黔中途擊敗髮逆

勞總督崇光赴雲貴任由四川彭水入黔甫抵綏陽適僞翼王石達開餘黨萬人竄至勞總督馳抵旺草

汎民寨猝然號召鄉團分投部勒連日轉戰斃賊數百人竝飛調總兵沈宏富馳至會勦四月初八日軍練分道竝進殺賊千人生擒一百餘名賊匪由山逕小路遁竄各團四路兜截復殺賊數百名適沈宏富等渡河追至匹馬衝鋒各勇齊心奮擊追殺二十餘里斃賊三四千人生擒五百餘名賊由合面山遁回五南坪

川軍勦滅巨股生擒逆首石達開

僞翼王石達開與僞北王韋昌輝分爭後率其死黨

四竄屢犯浙江福建湖北湖南廣西廣東等省邊境  
並擾及滇黔蓄意入川以圖竊據疊經官軍堵截復  
分股旁竄牽綴大兵而自率大隊由雲南之米糧壩  
渡金江經駱總督派總兵唐友耕知府蔡步鐘等調  
集漢土各兵分紮沿河要隘四面兜勦三月二十七  
至四月初四等日屢次搶渡均被我軍槍斃擄無  
一生還遂撲松林小河以冀直趨天全土千戶王應  
元等扼河力戰斃賊數千人十二三等日都司慶吉  
土司嶺承恩等率兵夜劫賊壘斃賊無數遂將馬鞍

山占住絕賊糧道蔡步鍾亦派兵過河殺斃數百名  
石逆自知陷入絕地傾巢而出圖撲大小兩河唐友  
耕等督兵迎勦擊沈登筏賊多名二十三日石逆親  
擁大衆水陸分撲官軍沿河用火彈火箭拋射並以  
槍礮轟擊都司謝國太參將楊應剛等由松林小河  
馬鞍山兩路齊進直撲紫打地方將賊巢一律焚毀  
斃賊數千名其逃竄之賊復經漢土兵練兩面夾擊  
賊衆墜巖落水浮尸蔽流而下者以萬餘計石逆率  
餘黨七八千人奔至老鴉璇復爲土兵截殺石逆等

進退無路倉皇失據爲楊應剛等擒獲解省訊明極  
刑處死竝於起解石逆之夜將餘黨三千餘人以火  
箭爲號同時圍殺淨盡溯自洪秀全粵西倡亂僞王  
五名僞南王馮雲山僞西王蕭朝貴均先在湖南擊  
斃僞東王楊秀清僞北王韋昌輝自相殘殺族滅性  
僞翼王石達開素蓄大志假仁義以籠絡其下賊爭  
附之藉與韋逆分顏獨樹一幟幾不可制至是爲川  
軍擒戮五僞王全滅天下快之

五月會營水陸各軍會克江浦浦口二縣草鞋夾燕子

礮等數隘進破九洲賊營江面一律肅清

我軍自攻克巢舍和三城及雨花臺石城後羣賊大駭兼以上海各軍既克崑新將圖蘇郡逆衆倉皇失措紛紛南渡天長六合來安等處次第解圍浦口之賊棄城遁走江浦之賊獻書詣營乞降浙江提督鮑超記名按察使劉連捷察知其詐於五月初九日引軍疾進提督蕭慶衍亦引軍來會進次江浦賊已聞風宵遁遂將江浦浦口一併收復沿途追勦抄過賊前賊正竄九洲洲賊不納被我舟師截江圍勦死

者駢積以數萬計初十日我軍將有事於九洑洲曾  
巡撫乘夜至新江口與彭侍郎福建水師楊提督岳  
斌會勘該洲在驚流急湍之中高峙僞城難於猝取  
計莫如先攻南岸諸隘以撤其藩籬十二日派總兵  
丁泗濱等爲頭隊從下關進總兵喻俊明等爲第二  
隊從草鞋夾進調派既定各將弁循南岸飛駛而下  
將逼賊巢賊衆萬礮齊轟猝不得近我軍豫以枯荻  
灌油縱火江上焚賊舟數百衆男乘勢薄壘從煙火  
中捨險而入立平下關草鞋夾八賊壘十四日分兵

襲破燕子磯殺賊毀壘而還先是楊提督詢知北岸  
叢莽中有堤埂一道可達九洲洲賊濠之外至是商  
令劉連捷等陸師數隊由堤埂闕處兜水進十五日  
會合水師大舉進攻人殊死戰槍礮對轟片刻不息  
至日晡城防少懈乃於初更時移船潛近賊壘乘西  
南風縱火立焚賊船數隻風烈火猛延及洲上卡房  
各軍大呼升岸躍過重濠肉薄齊登前鋒旣殪後者  
更進二更後越牆撲入聚殲羣賊無一脫者遂奪九  
洲洲偽城長江一律肅清



上海軍會勦江陰無錫援賊攻克南北涸各邨鎮

自克楊舍汛後李巡撫令統領李鶴章會督各軍進  
紮常熟縣之王莊與黃提督劉銘傳等力禦援賊章  
護普潮侍五僞王率黨八九萬圍援江陰窺窺常熟  
自江陰界之顧山至無錫城外連亘數十里賊營密  
布其江陰另股於五月十四五日圍撲楊舍經劉銘  
傳痛勦擒斬逆匪千餘人僞忠王復渡江回援將合  
五逆之衆分路內犯李巡撫與黃提督等定議滾營  
前進以銘傳七營之衆進北涸攻其左總兵郭松林

吳建瀛副將黃中元所部八營進南潤攻其右總兵  
勝嗣武張樹聲周盛波所部八營進麥市橋爲中路  
三路各增三營以厚兵力黃提督水師各營分助之  
鶴章自率馬隊列陣顧山以督戰別遣將周壽昌黃  
金志進張涇備無錫援賊二十一日分路殺賊均有  
斬擒二十二日銘傳嗣武軍焚賊船於麥市橋時賊  
勢甚熾而無錫賊由張涇至鶴章望見之恐壽昌軍  
單急遣馬隊助勦敗之於嚴家橋賊退屯長涇鶴章  
因令中右軍大隊伏河岸僞欲潛渡而水師急進南

澗焚賊船松林乘間越南澗趨長涇賊大駭愕我軍  
衝陣血戰賊大潰追之至祝塘而北澗賊援長涇欲  
斷我軍歸路建瀛中元之軍敗之時酷暑將士飢渴  
乃罷戰其夜李鶴章傳令諸將乘月上潛劫賊營並  
令大隊伏要口四更後各路火器齊發槍礮如雨逆  
衆紛紛奔潰水陸官軍鼓譟而進劉銘傳攻破北澗  
賊營二十七座滕嗣武攻破麥市賊營二十三座郭  
松林等攻破南澗賊營三十五座擒斬逆衆六十七  
名戰至天明江陰無錫援賊由跨塘橋長涇等處分

路來援與敗賊合隊迎拒各軍以小隊衝進以大隊  
圍塞之戰不數合賊反奔追至八字尖竹塘等處沿  
途殺斃溺斃八九千人踰毀賊營賊卡一百餘座計  
二日一夜生擒僞王宗僞朝將僞主將及義安福燕  
豫五等之逆百餘名悍賊五千餘名轟斃斬斃萬餘  
名溺死者無算焚燒賊船七十餘隻奪獲賊船三十  
餘隻馬五百餘匹僞印二百餘顆檣械數千件顧山  
以西縱橫七八十里一律肅清銘傳仍駐楊舍黃提  
督水師駐大河六月初旬賊疊撲楊舍別股又擾長

涇以綴大河援楊舍之軍均擊走之

江西浙江兩軍會攻饒州府屬之陶家渡賊壘

逆匪竄擾江西饒州府屬盤踞陶家渡五月二十四日浙江臬司劉典親督各軍分路進攻逆衆蛇伏牆內環放洋槍守備楊旬德等首先衝入以火箭噴筒焚毀更樓木椿各軍從烈燄中奮勇而進斃賊甚多次日參將韓進春等復督隊進攻逆匪大股乘夜從僻徑潛遁仍畱死黨數千踞壘抗拒二十六日各營分路追勦截殺無算旋即衝入賊壘風迅火發餘逆

潰敗棄巢而遁

六月上海軍攻克花涇港同里鎮賊壘收復吳江震澤  
二縣

蘇州踞逆以吳江震澤二縣同城當江浙之衝爲嘉  
湖援賊必由之路添聚賊黨分紮花涇港同里鎮等  
處李巡撫將圍蘇州乃今程學啓以水陸十三營與  
戈登李恒嵩常勝軍乘船至九里湖距花涇港同里  
鎮均十餘里留三營扼湖口而自督各軍會戈登取  
花涇港十二日學啓督副將歐陽利見敗賊於夾浦

破其石壘十三日官軍水陸並進張光太等將湖北賊壘蹋毀生擒五百餘名潰賊蹙水遁官軍以槍礮排擊斃賊數千蘇州賊酋突率二萬人礮船一百餘隻由尹山橋圍攻花涇港石壘程學啓親督水陸各軍往援分抄賊後經副將劉士奇奮勇夾擊賊卽潰遁將同里賊營攻克李恆嵩知官軍攻勦同里之際城賊必不爲備先將北門外賊卡蹋毀並將回竄之賊擒斬淨盡十四日程學啓督軍進逼城根合力攻勦守賊自知不敵開門出降吳江震澤縣城卽於辰

刻收復程學啓督四營籌城守十六日嘉興援賊數萬至南門程學啓率衆掩擊敗走之而分路設防以備嘉興蘇州援賊時賊連犯夾浦由平望窺同里鎮後路又直犯同里均擊退李巡撫乃謀取江陰嘉善以分賊勢